

山西通志卷第一百

山西巡撫都察院右副都御史臣覺羅石麟奉

旨修輯

人物一

山西人物唐虞尙矣繇夏暨元明彪炳竹素者多有而載籍所紀以勲多著十率得四五此秦晉人物之權衡也

國家損益百代甄敘九品維并汾右輔川呈嶽貢之才詰業烝烝嚮風而歷代人物亦胥列銓綜今次厥行事如左忠烈不別編卽列人物蓋非忠烈無以爲人物此又用義理權衡而定勲庸閭閻之差等也至有以文章著者別爲文苑附載簡末以存其槩云志人物

太原府

周

唐叔虞武王子初武王夢天謂已曰余命女生子名虞余與之唐及生子文在手曰虞遂因命之武王崩成王立唐有亂周公誅滅唐成王與叔虞戲削桐葉爲珪以與叔虞曰以此封若史佚因請擇日立叔虞成王曰吾與之戲耳史佚曰天子無戲言言則史書之禮成之樂歌之於是遂封叔虞於唐故曰唐叔虞姓姬氏字子千唐叔子燮是爲晉侯晉侯子寧族是爲武侯武侯之子服人是爲成侯成侯子福是爲厲侯厲侯子宜舊是爲靖侯靖侯已來年紀可推自唐叔至靖侯五世無其年數靖侯十八年卒子釐侯司徒立釐侯十八年卒子獻侯籍立獻侯十一年卒子穆侯費生立穆侯二十七年卒弟福自立太子仇出奔四

年仇率其徒襲殤叔而立

文侯仇平王東遷文侯迎送安定之平王錫以秬鬯圭瓚作
文侯之命王若曰父義和不顯文武克慎明德昭升于上
敷聞在下惟時上帝集厥命于文王亦惟先正克左右昭
事厥辟越小大謀猷罔不率從肆先祖懷在位嗚呼閔予
小子嗣造天丕愆殄資澤于下民侵戎我國家純卽我御
事罔或者壽俊在厥服予則罔克曰惟祖惟父其伊恤朕
躬嗚呼有績予一人永綏在位父義和汝克紹乃顯祖汝
肇刑文武用會紹乃辟追孝于前文人汝多修扞我于艱
若汝子嘉王曰父義和其歸視爾師寧爾邦用賚爾秬鬯
一卣彤弓一彤矢百盧弓一盧矢百馬四匹父往哉柔遠
能邇惠康小民無荒寧簡恤爾都用成爾顯德

左傳平王
之東遷也

晉鄭焉依書傳平王立而東遷洛邑晉文侯迎送安定之王錫命焉史記以爲襄王爲文公作謨

文侯三

十五年卒子昭侯伯立昭侯元年封文侯弟成師於曲沃靖侯庶孫欒賓傳之曲沃邑大於翼號爲桓叔桓叔好德晉國之衆皆附焉七年晉大臣潘父弑昭侯而迎曲沃桓叔桓叔欲入晉晉人發兵攻之桓叔敗還歸曲沃晉人共立昭侯子平爲君是爲孝侯誅潘父孝侯八年曲沃桓叔卒子鰭代是爲曲沃莊伯孝侯十五年莊伯弑孝侯於翼晉人攻莊伯莊伯復入曲沃晉人復立孝侯子郄爲君是爲鄂侯鄂侯六年卒莊伯興兵伐晉周平王使虢公將兵伐莊伯莊伯走保曲沃晉人共立鄂侯子光是爲哀侯哀侯二年莊伯卒子稱立是爲曲沃武公哀侯八年晉侵陘廷陘廷與武公謀九年伐晉於汾旁虜哀侯晉人乃立哀

侯子小子爲君是爲小子侯小子元年武公使韓萬殺虜晉哀侯晉小子之四年武公誘召晉小子殺之周桓王使虢仲伐武公武公入於曲沃乃立晉哀侯弟緡爲晉侯晉侯緡二十八年武公伐晉滅之

武公稱曲沃莊伯子也周釐王四年伐晉滅之盡以其寶器賂周釐王王命武公爲晉君列爲諸侯於是盡併晉地更號曰晉武公始都晉國自桓叔初封曲沃以至武公滅晉凡六十七歲而卒代晉爲諸侯武公代晉二歲卒與曲沃通年卽位凡三十九年而卒子獻公詭諸立獻公五年伐驪戎得驪姬及驪姬娣俱愛幸之八年士蒍說公盡殺諸公子而城聚都之命曰絳始都絳十二年驪姬生奚齊獻公欲廢太子申生乃使居曲沃公子重耳居蒲夷吾居屈

公與驪姬子奚齊居絳十六年獻公作二軍公將上軍申生將下軍趙夙御戎畢萬爲右滅霍滅魏滅耿還爲申生城曲沃賜趙夙耿賜畢萬魏二十一年驪姬譖申生申生自殺於新城重耳奔狄夷吾奔梁二十二年滅虢滅虞二十六年獻公病以奚齊爲後使荀息傅之公卒里克殺奚齊於喪次荀息立卓子而葬里克弑卓子於朝荀息死之使迎重耳於狄重耳辭乃迎夷吾於梁立之是爲惠公六年九月秦繆公伐晉獲公公妹繆公夫人請歸之十四年卒子圉立是爲懷公是年秦送重耳入晉殺懷公於高粱文公重耳晉獻公子自少好士年十七有賢士五人曰趙衰狐偃賈佗先軫魏武子獻公二十一年殺太子申生重耳奔狄是時年四十三從此五士其餘不名者數十人狄伐

咎如得二女以長女妻重耳生伯儵叔劉以少女妻趙衰
生盾居狄五歲而獻公卒里克等殺奚齊卓子使人迎重
耳重耳畏殺固辭克等迎其弟夷吾立之是爲惠公惠公
七年畏重耳乃使宦者履鞮與壯士欲殺重耳重耳聞之
乃謀與趙衰等適齊居狄凡十二年而去過衛衛文公不
禮去過五鹿飢而從野人乞食野人盛土器中進之重耳
怒趙衰曰土者有土也君其拜受之至齊齊桓公厚禮而
以宗女妻之有馬二十乘重耳安之留齊凡五歲齊女與
趙衰等謀醉重耳載以行過曹曹共公不禮欲觀重耳駢
脇曹大夫釐負羈諫之不從負羈乃私遺重耳食置璧其
下重耳受其食還其璧去過宋宋襄公新困兵於楚傷於
泓聞重耳賢乃以國禮禮於重耳過鄭鄭文公弗禮鄭叔

詹諫之不聽去之楚楚成王以適諸侯禮待之厚遇重耳重耳甚卑成王曰子卽反國何以報寡人重耳曰羽毛齒角玉帛君王所餘未知所以報王曰雖然何以報不穀重耳曰卽不得已與君王以兵車會平原廣澤請辟王三舍楚將子玉怒請殺之成王曰晉公子賢而困於外久從者皆國器此天所置庸可殺乎居楚數月而晉太子圉亡秦秦怨之聞重耳在楚乃召之成王曰楚遠更數國乃至晉秦晉接境秦君賢子其勉行厚送重耳至秦秦繆公以宗女五人妻重耳故子圉妻與往重耳不欲受司空季子曰其國且伐況其故妻乎且受以結秦親而求入子乃拘小禮忘大醜乎遂受繆公大歡與重耳飲趙衰歌黍苗詩繆公曰知子急欲反國矣趙衰與重耳下拜曰孤臣之仰君

如百穀之望時雨是時惠公卒子圉立欒卻等皆陰求殺重耳趙衰等反國爲內應甚衆於是秦繆公乃發兵與重耳歸晉重耳出亡凡十九歲而得入時年六十二矣晉人多附襄王十七年二月辛丑入於晉丁未卽位懷公故大臣呂甥卻芮等恐誅與其徒謀燒公宮始嘗欲殺公宦者履鞮知其謀以告公乃爲微行會秦繆公於王城誘呂卻等殺之河上晉國復而公得歸夏迎夫人於秦秦所與文公妻者卒爲夫人秦送三千人爲衛以備晉亂文公修政施惠百姓賞從亡者及功臣大者封邑小者尊爵未至介子推推亦不言祿祿亦不及與其母隱去不復見公聞其入綿上山中於是環綿上山中而封之以爲介推田號曰介山從亡賤臣壺叔曰君三行賞賞不及臣請罪公報曰

夫導我以仁義防我以德惠此受上賞輔我以行卒以成
立此受次賞矢石之難汗馬之勞此復受次賞若以力事
而無補吾缺者此受次賞三賞之後故且及于晉人聞之
皆說二年春秦軍河上將入王趙衰曰求霸莫如入王尊
周周晉同姓晉不先入王後秦入之母以令於天下方今
尊王晉之資也三月甲辰公乃發兵至陽樊圍溫殺帶入
襄王於周襄王賜公河內陽樊之地四年楚成王及諸侯
圍宋宋公孫固如晉告急先軫曰報施定霸於今在矣狐
偃曰楚新得曹而初婚於衛若伐曹衛楚必救之則宋免
矣於是作三軍冬十二月晉兵下山東五年春文公欲伐
曹假道於衛衛人弗許還自河南渡侵曹伐衛正月取五
鹿二月與齊侯盟於斂孟衛侯請盟晉晉人不許衛侯欲

與楚國人不欲故出其君以說晉楚救衛不卒晉侯圍
三月丙午晉師入曹數之以其不用釐負羈言而用美女
乘軒者三百人也令軍毋入釐負羈宗家以報德楚圍宋
復告急文公欲救則攻楚爲楚嘗有德欲釋宋宋又嘗有
德於晉患之先軫曰執曹伯分曹衛地以與宋楚急曹衛
其勢宜釋宋於是文公從之而楚成王乃引兵歸楚將子
玉請伐晉成王曰晉侯亡在外十九年困日久矣果得反
國險阨盡知之能用其民天之所開不可當子玉固請之
使宛春告晉請復衛侯而封曹臣亦釋宋咎先軫說公囚
宛春於衛且私許復曹衛告絕於楚楚得臣怒擊晉師晉
師退軍吏曰爲何退文公曰昔在楚約退三舍可信乎楚
師欲去得臣不肖四月戊辰宋公齊將秦將與公次城濮

已巳與楚兵合戰楚兵敗得臣收餘兵去甲午晉師還至
衡雍作王宮於踐土初鄭助楚楚敗懼使人請盟公與鄭
伯盟五月丁未獻楚俘於周駟介百乘徒兵千天子使王
子虎命晉侯爲伯賜大輅彤弓矢百茲弓矢千秬鬯一卣
珪瓚虎賁三百人晉侯三辭然後稽首受之於是晉文公
稱伯盟諸侯於王庭晉焚楚軍火數日不息公歎左右曰
勝楚而君猶憂何也公曰吾聞能勝而安者唯聖人且子
玉猶在庸可喜乎楚成王歸讓責子玉子玉自殺公乃喜
六月復入衛侯是年冬公會諸侯於溫欲朝周恐有畔者
乃使人言襄王狩於河陽壬申遂率諸侯朝王於踐土丁
丑圍許曹伯臣或說公復曹伯公從之七年與秦繆公共
圍鄭以其無禮於公三過時及助楚於城濮也九年冬

子襄公歡立是歲秦繆公發兵襲鄭襄公元年春秦師滅滑而還晉擊之襄公墨衰經四月敗秦師於殽遂墨衰經以葬文公四年秦繆公大興兵伐我渡河取王官封殽尸而去五年晉伐秦取新城六年趙衰欒枝咎犯先且居皆卒趙盾代衰執政七年八月襄公卒趙盾使士蔑士會如秦迎襄公弟公子雍繆嬴爭之盾畏誅乃背所迎而立太子夷臯是爲靈公發兵以拒秦送公子雍者敗之於令狐先蔑隨會亡奔秦四年伐秦取少梁秦亦取晉之殽六年秦康公伐晉取羈馬靈公怒使趙盾趙穿卻缺擊秦大戰河曲趙穿最有功七年令魏壽餘誘士會歸晉十四年靈公壯侈厚斂以彫牆從臺上彈人觀其避丸宰夫肱熊蹯不熟公怒殺之趙盾隨會前數諫不聽已又見死人手隨

會先諫不聽公患之使鉏麇刺趙盾不果已復飲趙盾酒
伏甲將攻之盾右提彌明禦而免遂奔未出晉境乙丑趙
穿襲殺靈公於桃園而迎趙盾盾使趙穿迎襄公弟黑臀
於周立之是爲成公七年成公與楚莊王爭彊會諸侯於
扈復救鄭與楚戰敗之是年成公卒子據立是爲景公三
年楚圍鄭晉使荀林父等救之楚與晉軍大戰鄭新附楚
畏之反助楚攻晉晉軍敗績楚虜我將智罃歸五年伐鄭
爲助楚故也七年使隨會滅赤狄十一年使卻克樂書韓
厥與魯衛共伐齊與頃公戰於鞏齊師敗走晉追北至齊
頃公獻寶器以求平而還十二年冬齊頃公如晉欲上尊
景公爲王景公讓不敢晉始作六軍韓厥輦朔趙穿荀躒
趙括趙旃皆爲卿智罃自楚歸十三年伐鄭取汜十六年

吳晉始通約伐楚十七年誅趙同趙括族滅之韓厥請復趙庶子武爲趙後十九年夏景公病立其太子壽曼爲君是爲厲公後月餘景公卒厲公元年初立欲和諸侯與秦桓公夾河而盟歸而秦倍盟與狄謀伐晉三年使呂相讓秦因與諸侯伐秦至涇敗秦於麻隧五年三卻讒伯宗殺之厲公六年春鄭倍晉與楚盟厲公自將伐之五月渡河聞楚兵來救與戰射中楚共王目敗之於鄢陵晉由此威諸侯欲以令天下求霸厲公多外嬖姬歸欲盡去羣大夫而立諸姬兄弟令胥童以兵八百人襲攻殺三卻胥童因以甲劫欒書中行偃於朝曰不殺二子患必及公公不忍使復位以胥童爲卿閏月乙卯厲公游匠麗氏欒書中行偃以其黨襲捕厲公囚之殺胥童使人迎公子周於周而

立之是爲悼公

悼公襄公少子桓叔之孫也簡王十四年正月厲公遇弑晉使智罃迎立之時年十四矣公既立朝謂大夫曰大父父皆不得立而避難於周客死焉寡人自以疎遠毋幾爲君今大夫不忘文襄之意而惠立桓叔之後賴宗廟大夫之靈得奉晉祀豈敢不戰戰乎大夫其亦佐寡人於是逐不臣者七人修舊功施德惠收文公入時功臣後秋伐鄭鄭師敗遂至陳靈王二年會諸侯於雞澤公弟楊干亂行司馬魏絳戮其僕公怒或諫公公卒賢絳任之政使和戎戎大親附八年之中九合諸侯公歸功於絳賜以金石之樂十年冬秦取我櫟十三年公使六卿率諸侯伐秦度涇大敗秦軍至櫟林而去十四年公問治國於師曠師曠曰唯